

Sakspapir

Saksnr	Utvalg	Type	Dato
037/23	Kommunestyret	PS	22.06.2023

Sakshandsamar	Arkiv	ArkivsakID
Trine Merete Jansen	FA-B19	23/749

Tilstandsrapport for barnehage og grunnskule, 2022/2023

Vedlegg

Kvalitetsmelding - Tilstandsrapport barnehage og grunnskule 2022/2023

Framlegg til vedtak:

Kommunestyret tek tilstandsrapporten for barnehage og grunnskule 2022/2023 til orientering.

Kommunestyret - 037/23 - 22.06.2023

KS - behandling:

Kommunalsjef oppvekst og kultur, Trine M. Jansen, orienterte overordna om saka. Presentasjonen ligg ved protokollen.

Styrar i Kystbarnehagen Britt Ystebø, og styrar i Kaland barnehage Sissel B. Monslaup, orienterte om situasjonen i barnehagane. Presentasjonen ligg ved protokollen.

Rektor på Kaland skule Birgitte Gullaksen, og rektor på Årås skule Bodil Boie Brekkan, orienterte om situasjonen ved skulane. Presentasjonen ligg ved protokollen.

Spørsmål og debatt:

Helge Dyrkolbotn (KrF) spurte om utfordringane kring bemanning i barnehagane det siste året, med stengte avdelingar, og spurte om styrarane hadde ein fasit på kva ein kan gjera for å unngå dette. Britt Ystebø svara at det denne gongen var mykje sjukemeldingar på ein gong, og det var ekstraordinært. Men det er til vanleg to tilsette som er ute med sjukdom, så det hadde vore behov for to stillingar slik at ein kunne sleppa å vera for få.

Reidar Øksnes (Sp) spurte om det var mogleg å inngå avtalar med ulike firma, som gjerne er avhengige av at dei tilsette får barnehageplass for å starta i jobb der. Per Lerøy (Ap) sa at dette er noko ein har hatt tidlegare, og som det kan vera aktuelt å sjå på.

Britt Ystebø (Ap) sa at det må vera mogleg å ha faste stillingar heller enn vikarar og overtid. Vikarbruk kostar også, og krev mykje arbeid med å henta inn. Ba om at barnehagane kom med innspel til

budsjettprosessen på korleis dette kan løysast. Ystebø spurte også om tilhøvet mellom barn og plassar, fekk svar om at barn under 3 år tar 2 plassar.

Reidar Ulvøy (Ap) ba om at administrasjonen må syta for meir fleksibilitet, at tilsette kan jobba ulike stader, som i både barnehage og skule.

Kommunalsjef oppvekst og kultur, Trine M. Jansen, sa om bemanning at det ser ut for at rammene til bemanning i barnehagane er litt for knappe. Elles ser ein nasjonalt at det er høgt sjukefråvær i barnehagane, det er gjerne krevjande å stå i ein arbeidssituasjon med stort press og mykje å ta seg av. Om fleksibilitet mellom barnehage og skule sa Jansen at det er vanskeleg sidan det er så stort press begge stader. Men for dei to sist tilsette i barnehage er det presisert at det skal vera fleksibilitet på arbeidsstad.

Britt Ystebø (Ap) viste til erfaringa frå Helse Bergen om bemanningssenter, der ein kartlegg kompetansen, og lar tilsette jobba ulike stader der dei er kvalifiserte.

Ordførar Per Lerøy (Ap) ba om at kommunedirektøren orienterte om reparasjon av hærverk. Kommunedirektør Bjørnar Fjellhaug svara at dette skal ordnast delvis av teknisk eining, eller ved innsats frå elevar som har gjort hærverk og deira foreldre. Vidare vedlikehald av ulike bygg ligg i vedlikehaldsplanen.

Om symjehallen på Kaland sa Fjellhaug at dette kjem som ei eiga sak til hausten, for å få oversikt over kva som må renoverast. Ønskjer å ta med seg gymsalen på Kaland i same prosjekt, gymsalen er det rommet på Kaland som står att å renovera.

Helge Dyrkolbotn (KrF) takka for orienteringa og det arbeidet som er gjort. Dyrkolbotn sa vidare at det ikkje er noko som er så lett som å øydelegga, som det som er litt øydelagt frå før. Litt verre å gjera nytt hærverk når det ser OK ut.

Reidar Øksnes (Sp) sa at det var ei god orientering, men kommunen kunne klart seg utan dette problemet med språkbruk og rasisme. Her må kommunestyret går inn meir aktivt. For hærverk må ein både leggja inn midlar i budsjetta, og jobba med å ansvarleggjera foreldra på ein sterkare måte. Foreldre og besteforeldre har også eit ansvar her.

Ordførar Per Lerøy (Ap) sa at foreldra har mykje ansvar her.

Reidar Ulvøy (Ap) viste til besøket frå ungdomsrådet tidlegare i vår, og at ungdommane hadde etterlyst helsesjukepleiar og andre å snakka med. Ulvøy spurte om skulane har nok ressursar av denne typen. Bodil Boie Brekkan svara om Årås skule at dei har helsesjukepleiar tre dagar i veka, tilbakemeldingar frå helsesjukepleiar er at tida går til enkeltsamtalar, og er lite tid til systemtiltak.

Helge Dyrkolbotn viste til at AVS har helsesjukepleiar to dagar i veka, og dei har frå hausten tilsett to miljøkoordinatorar som skal jobba med å støtta elevane, mellom anna dei som har flytta heimefrå og bur på hybel i Austrheim.

Kommunedirektør Bjørnar Fjellhaug sa at midlar til uteområdet ved Årås skule kjem med i den neste økonomi- og budsjettplanen. Vidare sa Fjellhaug at kommunestyret vil få vidare orienteringar i første møte til hausten om arbeidet med helsesjukepleiar og denne typen tilbod. Jobbar også med å skaffa psykolog til kommunen, og har lyst ut ei prosjektstilling innan mellom anna psykisk helse.

Handsaming i kommunestyret:

Kommunedirektøren sitt framlegg vart samrøystes vedteke.

KS - vedtak:

Kommunestyret tek tilstandsrapporten for barnehage og grunnskule 2022/2023 til orientering.

Saksopplysninger:

Tilstandsrapporten er eit sentralt element i det nasjonale kvalitetsvurderingssystemet. Regjeringa har fastsett mål knytte til læringsresultat, fråfall og læringsmiljø som grunnlag for å vurdere kvaliteten i grunnopplæringa, jf. St.meld. nr 31 (2007-2008). Til dei nasjonale målsetjingane har regjeringa sett opp indikatorar som skal gi grunnlag for å vurdere kor langt skoleeigaren er kommen i å nå måla.

Tilstandsrapporten skal som eit minimum omtale læringsresultat, fråfall og læringsmiljø, men kan byggjast ut med annan omtale som skoleeigaren meiner er føremålstenleg ut frå lokale behov. Det er data frå Utdanningsdirektoratet som hovudsakleg skal brukast som grunnlag for skoleeigaren si vurdering av tilstanden, men det følgjer av St.meld. nr. 31 (2007-2008) at skuleeigarar og skular blir oppmoda til å føre opp konkrete målsetjingar for kva dei skal oppnå innanfor dei målområda som er sette opp.

I Austrheim legg vi vekt på å sikre «ein raud tråd» gjennom oppveksten til barn og unge, og difor legg vi fram samla tilstandsrapport for barnehage og skule. Ein felles tilstandsrapport skal hjelpe oss med å få eit felles blick i vidareutvikling av barnehage og skule. Tilstandsrapporten er eit godt grunnlag for å gi oppveksteigar eit kunnskapsbasert og bevisst forhold til innhald og kvalitet i barnehage og skule.

Konklusjon

Kommunedirektøren tilrår at Kommunestyret tek tilstandsrapporten for barnehage og grunnskule 2022/2023 til orientering.